

云南史料丛刊

第五十六辑

云南大学历史系
云南地方古代史
研究室
(原民族历史)

雲南史料叢刊第五十六輯目錄

張允隨奏稿 下

乾隆八年八月初六日

為恭謝天恩事。乾隆八年七月二十三日，准吏部咨開，乾隆八年五月二十六日，奉上諭：「慶復著補授川陝總督，馬爾泰著補授兩廣總督，張著授為雲南總督，兼管巡撫事務，欽此。」咨移到臣。臣隨設香案，望闕叩頭謝恩。訖，竊臣猥以庸材，遭逢殊遇，蒙世宗憲皇帝特達之知，由布政使擢授巡撫，備位五載，報稱未能，恭遇我皇上龍飛御極，臣以邊省外臣，尚未瞻覲天顏，即蒙恩旨，署理總督印務，嗣於乾隆三年陞見回任之後，疊荷恩綸，一署黔篆，再攝滇符，八載之中，三膺寵命，臣雖勉策駑鈍，矢效涓埃，而職大才微，深虞隕越，每當清夜捫心之際，常切捐糜莫報之忱，乃蒙聖主天恩，特授臣為雲南總督，兼管巡撫事務，臣聞命自天，感激無地，伏思總督統轄文武，巡撫職重拊循，非具出羣之才，難以克稱其實，況隕居天末，三面臨邊，布德宣威，舉動皆關經畫，安內攘外，措施務協機宜，在分理猶懼弗勝，更畀之以兼任，即暫攝已慚逾分，復加以即真，臣膺茲異數，縱使

肝腦塗地，亦何足上副恩知。惟有殫竭悃誠，夙夜匪懈，體誠求保赤之聖心，以敷政。時時為百姓計安全，推招携懷遠之帝德，以籌邊事。為封疆謀莫定，務期兵精餉裕，物阜民康，上紓九重南顧之懷，庶盡臣職於毫微，即以仰報主恩於萬一耳。除恭疏奏謝外，謹繕摺叩謝天恩，伏祈皇上睿鑒。臣謹奏。

硃批：所奏俱悉，勉為之，以副朕望。

乾隆八年九月二十一日

為欽奉上諭事：乾隆八年八月初七日，准兵部加封遞到大學士鄂爾泰、張廷玉、徐本尚書公訥親字寄，內開：乾隆八年六月二十五日，奉上諭：廣西之鎮安府、雲南之廣南府各有通安南之隘口，自前歲匪徒滋擾，保樂夷州以來，滇、粵兩省文武大員，自應嚴飭守隘員弁，加謹防範，不許匪類往來出入，以清邊境。朕聞粵省稽查頗嚴，而滇省則近于疏懈，廣南土人出交者紛紛，甚為混雜。張亦未將隘口情形常時陳奏，未免視為泛常。爾等可傳旨密諭張令其加意防

範欽此。遵旨寄信到臣。臣跪讀之下，仰見我皇上萬方在宥，審慮周詳，不勝祇懼惶恐。臣先于七月二十二日准到軍機處來文，議覆前任廣西提督譚行義奏廣南土目招携土民欲由粵境回滇一摺。臣將辦過情形詳悉奏聞。當經臣將安南賊首矣楊、莫正豹俱係粵西人，由泗城、鎮安、西林等處糾集沙匪出交，現經滇省拿獲。粵西沙匪五百餘名解交該省地方官收審，並臣設法誘擒偽官賊目及招回廣南沙夷區處安插緣由，遵旨覆奏，自蒙聖鑒。但臣身任滇疆，滇安南有事，不能嚴密周防，致所屬土皇上天恩，不即加嚴譴，特降諭旨令其加意防範。臣感激慚悚，無地自容，惟有嚴飭地方文武督率守隘，弁兵實力會哨，巡查防堵，並責成流土各官，將管內夷民編立保甲，嚴加約束，時刻稽查，勿令潛出滋事，以仰紓聖慮，稍贖前愆，除密行欽遵防範外，理合恭摺具奏，伏祈聖鑒。臣謹奏。

硃批：時常留心防範可也。

乾隆八年九月二十一日

為恭謝天恩事。乾隆八年八月十五日，臣賚摺家奴回滇，賚捧到御賜臣元宵聯句墨榻一冊。臣即出郊跪迎至署，恭設香案，望闕叩頭謝恩，祇受訖。欽惟我皇上道貫三才，學探四庫，文思默運，繼虞廷復旦之章，奎藻旁敷，邁漢代秋風之什，萃光芒於毫素，發為昭乘珠璣，漱芳潤於簡編，煥作中天日月，值良宵之賜宴，爰體物以摛辭，聖制倡元音，備舉養賢及民之旨，臣工和鼎寶，咸矢敬事後食之忱，即比興之遙深，信明良之契合，藏諸東壁，常偕珠斗騰輝，賜出南郊，頓令靈輶生色。臣身居邊末，心戀闕廷，未陪乙夜之豫遊，猥荷天章之寵錫，榮慚稽古，思窺管以未能，感切分甘，永載恩於無極，理合繕摺恭謝天恩，仰祈皇上睿鑒。臣謹奏。

硃批覽。

乾隆八年十一月十六日

為奏時事。乾隆八年九月十九日，據昭通府知府來謙鳴轉據永善縣分防副官村縣丞李蒼林報稱：所屬火盆里地方，頻臨大江，

沿江一帶，大山沙石兼生，土性鬆浮，易於坍塌。本年七月初七、八九等日，大雨連綿，山水泛漲，崖石被水浸壞，夾雜泥沙，將靠山臨江田地逐段冲壓，沿江房屋亦被冲塌，幸非一時傾塌，居民得以預為搬移，人口並無傷損等情到臣。臣查副官村距省二十餘站，村民田地、房屋被水冲塌，殊堪憫惻。臣於聞報之頃，即飭布政使阿蘭泰動發備公銀兩，委令候補通判張子玉星夜兼程前往，會同該地方官確勘，分別賑卹，併查冲塌田地，共該錢糧若干，仍查明附近有無可墾官山，撥給耕種，併令搭蓋房屋，以免露處。去後，茲據勘員候補通判張子玉等報稱：查得大盆里冲塌田地共二百二十七畝零，應免糧條銀七兩四分零，應賑人民共四十三戶，大口一百二十五口，小口八十六口，照例賑給三個月口糧，每大口日給銀一分，該銀九錢，小口減半，共賑銀一百五十一兩二錢。塌房二十四間，草房七十一間，每瓦房一間，賑銀一兩，草房一間，賑銀五錢，共賑銀五十九兩五錢。又晒得附近之分水嶺、寺院岡、鹽井溪三處官山，有地三段，每段可

開地五六十畝、六七十畝不等，分給各戶開墾耕種，並建蓋房屋居住，按照戶口大小，給以工本銀自四兩至六兩，八兩不等，俟成熟後，按照年限陞科。以上通共賑卹銀三百六兩七錢，俱係親身散給，小民均霑實惠，等情前來。伏思我皇上念切民依，痼瘼在抱，屢降諭旨，凡地方偶值偏災，俱令督撫諸臣因時就事，熟籌妥辦。今副官村大盆里冲壓田廬，臣仰體聖心，因時就事，加意撫綏賑卹，業已各有寧居，不致失所。除飭地方官將應免糧條併賑過銀數造冊出結，詳請具題外，合先繕摺奏聞，伏乞皇上睿鑒。臣謹奏。

硃批知道了。

乾隆八年十二月二十日。

為請旨事。竊查雍正元年定例，內開：督撫所延幕賓，如果効年久，擇其人品醇謹，辦事幹練者，題請議敘，給與職銜，其本身原有職銜者，准予先用。如有才守出羣者，該督撫專摺保薦，送部引見，從優議敘，奉旨依議，欽遵在案。臣自受任滇撫，政務殷繁，不能不需助理，

而刑名一事，民命攸關，臣尤加意慎重，然幕賓中，熟精律例而又能詳慎持平者，甚不易得。臣於乾隆元年，延有江南長洲縣候選縣丞朱象賢，為人端謹和平，臣與之商酌獄，務求明允，克副臣意。于乾隆五年，吏部掣選福建莆田縣縣丞，辭臣赴任。嗣聞其丁艱在籍，復由蘇延至來滇。臣觀其辦事動慎，有為有守，堪膺民社之任。今該員已經服滿，例應赴部候補。但臣蒙皇上殊恩，實授總督，仍管巡撫事務，刑名關係緊要，一時難得深信之人，可否仰懇天恩，准照蔣祝之例，將朱象賢留滇辦理幕務，俾効力，俟再者有勞績，另摺請旨叙用，以示鼓勵。隆恩出自聖主，非臣所敢擅便者也。為此恭摺具奏，伏候諭旨遵行。謹奏。

硃批：著照所請，行該部知道。

乾隆八年十二月二十日

為欽奉上諭事：據雲南布政使阿蘭泰會同署按察使張坦熊、糧儲道宮爾勸、驛鹽道郭振儀、迤東道宋壽圖等詳稱：竊照金沙江

通川河道，為滇民萬年永賴之利。案查乾隆二年，欽奉上諭：「水利所關，農工綦重，雲南跬步皆山，不通舟楫，田號雷鳴，民無積蓄，一遇荒歉，米價騰貴，較他省過數倍，是水利一事，尤不可不亟講也。朕常時籌慮，曾面詢大學士鄂，據奏：『臣前任雲南，曾開廣西剝隘至雲南河道，四川亦產米之區，滇屬牛欄江下有車洪江，可達川江，若能開通，舟楫可直抵高明州。』此外川河，前經引導，現有可達昭通者，若由昭通次第開鑿，或可通牛欄江，亦大有裨益。」等語，可將此情節寄字與尹繼善，令其悉籌畫，無論通粵、通川及本省河海，凡係水利及凡有關於民食者，皆當及時興修，不時疏濬，總期有備無患，要須因地制宜，事可謀成，斷不應惜費，如難奏效，亦不必強作。著併諭張知之。欽此。」欽遵在案。嗣於乾隆五年，經前任慶部院查出，東川府小江口入金沙江以達瀘州河道，會摺奏請開修，奉旨俞允，當經委令迤東道宋壽圖、廣南府陳克復為總理，選擇工員，前往勘估開修。于乾隆六年二月興工，試修過蜈蚣嶺者，那紅崖、安吉、熱風、峽口、猴崖、雙佛、濫

田壩、小溜筒等十灘，旋因水長停工，共用過匠夫工價、官役養廉、工食等銀一萬二千五百八十一兩零。嗣奉本部院以金江綿亘一千三百餘里，工程浩大，奏明分為上、下兩游，自金沙廠上至小江口為上游，自金沙廠下至叙州新開灘為下游，將上游工程委令迤東道、廣南府總理承修，下游工程委令曲靖府董廷揚總理，昭通府來謙、鳴協理承修，各專責成，以速鉅工。嗣因上游自蜈蚣嶺至雙佛一十五灘，灘勢最險，估銀七萬餘兩，食米六千餘石，開濬之後，重舡下水，仍須盤剝，查出旱路遠過各險灘，從對坪子灘起，至河口灘止，應修者一十九灘，共估需工價銀二萬七百二十二兩零，又官役養廉、工食銀一萬三千三十二兩，二項共需銀三萬三千七百五十四兩零，食米一千八百一十八石零。業經詳請咨部，奉准部覆在案。今查上游應修一十九灘，于乾隆六年十一月興工起，至七年四月止，又自七年十二月興工起，至八年三月止，兩次查照估計，如式開修完竣，共用過匠夫工價、官役養廉、工食等項銀二萬四千三百九十七兩。

零食米價銀三千三百九十七兩零，較原估節省銀九千三百五十六兩零。至奉發銅二十四萬觔，試運據承運之東川府田震、永善縣沈彩報稱：自乾隆八年二月初一日開運起，至四月十五日水長停運止，共運過京銅二十萬六百餘觔，每舢舨一隻載銅二千四百觔，自橫木灘歷對坪、迴流、濫田壩、牛欄頭、二、三灘、濯雲、小溜筒、大井壩、大水溝、新廠、密洛、巴崖、霧露、大風灣、河口等最險次險各灘，以抵永善縣銅房，俱安穩無虞。現交永善縣收貯，俟下游開通，運赴瀘州配運京局。自上游開修以來，去冬今春，川省商船販運米、鹽、貨物至金沙廠以上發賣者，較往年多至十數倍。即如二月間，金沙等廠米價，每倉石賣銀四兩二、三錢，商船一到，即減價一兩有餘，村寨夷民皆歡欣交易，不但滇民免艱食之虞，且可使無知蠻獠漸被華風。所有金江上游工程告竣緣由，理合詳請具題。等情到臣。臣伏查金沙一江發源西域，流經萬里，中貫川滇，祇因僻在夷方，前代未經疏濬，我皇上仁育為懷，萬方在宥，念雲南陟步皆山，不通舟楫，面詢大學士

臣鄂通、粵通川河道情形，特降諭旨，及時疏濬興修，以期有備無患。前督臣慶仰懇聖心，殫思竭慮，徧加諮詢，查出東川府屬卑中地方，由小江口入金沙江，以達川江水路，與臣會摺奏請開修，蒙聖恩俞允，當即委員試修，嗣緣慶調任兩廣，臣奉旨接辦，因灘多工鉅，奏明作上、下兩游疏濬興修，仰荷睿謨高遠，訓示周詳，臣黽勉遵循，敬謹辦理。三載以來，業將上游各灘疏鑿完竣，試運京銅，並無阻滯，而巴蜀商舡亦溯流直上，是江路通行，已有成效。臣猶恐夏秋水漲，或有沙石冲塞，致礙行舟，復于今冬十一月間水落之後，差員勘明修過工程，並無改易。又金江兩岸陸路，向緣險仄難行，人迹稀少，臣於上年奉旨會勘江工時，已將南岸那比渡以上至濫田壩六百餘里修治寬平，本年開修下游，又將那比渡以下至副官村四百餘里一律修治，現在商旅負販金沙樂馬等廠貿易者，千里之內，往來不絕，一俟下游工竣，江流循軌，舟楫通行，京局銅勛可收分運之效，滇民緩急，更獲接濟之資，此皆我皇上堯舜為心，痼疾在念，而又不限時日，

不惜帑金，能開千古未關之大川，永萬世無疆之利賴也。至此案江工，先經調任督臣慶復奏明，俟工竣，將在工人員分別題叙，以示鼓舞。軍機大臣等議得：通川河道，工費浩繁，自應遴委文武各員分任辦理。至効力人員，如果勤勞出力，工竣後一體題請，分別定議，奉硃批：依議。欽遵在案。今當工竣，所有總理上游江工之迤東、道宋、壽圖、署廣南府知府陳克復，協理上游江工東川府知府田震，監督江工昭通鎮標中軍遊擊韓杰，分修上游灘工署永善縣副官村縣丞 李蒼霖，試用州同楊茂，効力候選州同朱國樑，効力革職知縣劉嗣孔，効力即用州同方緯，効力考職縣丞陳克敏，効力生員裴瑗，効力年滿十總劉世美，効力革職守備徐文，効力革職把總劉國祥，以上各員，或膺總理，或任分修，自勘估興工，以迄報竣，悉能殫心竭力，不避艱險，不辭勞瘁，督率夫匠，上緊疏鑿，約束兵役，並無私入夷寨滋事，發給工價銀米，亦無短少扣剋。日則奔走崎嶇，夜則栖宿水次，較之各項河工，艱苦更甚，所當仰懇天恩，從優議叙，以勵勞員者也。至自

開修以來，凡一切查議事宜，俱能悉心經理，則布政使阿蘭泰、糧儲道宮爾勸、參籌工務，則有署按察使張坦熊、署驛鹽道郭振儀，差查工程，彈壓夷寨者，則有昭通鎮總兵官張士俊，以上各官，雖與承修工員有間，然皆同心協助，實力勸勸，應俟下游工竣之日，一併請旨議叙，以示獎勵。除用過工費銀米，現飭司道核實造冊，並遵照軍機大臣原議，將在工人員開具實蹟，分別等次，及修工月日另疏具題外，理合繕摺恭奏，伏乞皇上睿鑒施行。再，照金江水勢，究與內地江河不同，將來下游告成之後，一切灘工，不無歲修之費，以及旱路行旅往來，沿江一帶，建蓋橋樑、房屋，安設馬頭，在在需費。據管理銅務糧儲道宮爾勸詳，據湯丹等各廠商民呈稱：滇省產銅旺盛，商民賴以謀生，今蒙聖天子洪恩，不惜億萬帑金開濬金江，銅運通行，廠民得沾利益，情願于每秤毛銅三百五十觔之內，捐出一觔，運省變價，以備歲修之用。等情前來，臣不敢壅於上聞，合併附奏，仰祈聖鑒，謹奏。

硃批：所奏俱悉。

乾隆九年三月初五日

為恭謝天恩事。竊臣賚摺差回，恭捧皇上賜臣御製盛京賦到
 滇。臣出郊跪迎至署，恭設香案，望闕叩頭謝恩，祇領訖。欽惟我皇上
 至孝至仁，善繼善述，乘乾御宇，經綸兼位，育同符，出震膺圖，道法與
 清寧合撰，懋績緒緝熙之德，彌深追遠之思，撫道豐仁洽之時，爰舉
 謁陵之典，奉金輿而鳳駕，躬溯神丘，勤翠輦以東巡，心依祖德，禮成
 肆覲，敷言豐沛宏模，采煥重離，詳述邠岐勝槩，肇丕基於百世，誠哉
 矩地規天，揚鴻業於萬年，允矣，顯謨承烈，聰明廣運，合日星雲漢並
 作天章，睿知淵深，盡動植飛潛皆我奎藻。臣焚香跪誦，欣聆韶濩元
 音，繼手開緘，快睹琳琅鴻寶，荷恩光之（疑作龍）龍錫，慶溢遐陬，謹奕世以珍
 藏，尊同琬璧。臣不勝踴躍懼忭之至，謹繕摺恭謝天恩，仰祈睿鑒。謹
 奏。

硃批：覽。

乾隆九年三月初五日

為恭謝天恩事。乾隆九年正月十九日。臣賚摺家奴回滇。賚捧到皇上賜臣御書福字一幅。又燈夕錫宴聯句一部。克食二匣。臣出郊跪迎至署。恭設香案。望闕叩頭謝恩。祇領訖。竊惟賡雲颺日。中天開文命之符。集祉凝禧。萬國賴一人之慶。我皇上體元建極。錫福綏猷。揆奎藻于春宵。一德叶泰交之盛。沛恩膏于湛露。九天分玉食之珍。萬福攸同。合心膂股肱而徧德。至誠無息。統要荒侯甸以蒙休。殊榮遠建。天邊隅寶氣光騰於遐服。臣身依南斗。心戀北辰。未矢卷阿梧鳳之音。獲蒙太府球圖之錫。仰文思之廣運。照耀寰區。沐恩賚於非常。感深奕世。理合繕摺恭謝天恩。伏祈睿鑒。臣謹奏。

硃批覽

乾隆九年三月初五日

為奏明事。竊臣因上年昭通東川兩府秋成歉薄。恐春夏之交。民食不無拮据。奏明動發銅息銀二萬兩。令駐劄永寧轉運京銅之